

Ilinalathala ng Partido Komunista ng Pilipinas-Bagong Hukbong Bayan sa Rehiyong Bikol

REBOLUSYONARYONG
PANGMASANG
PAHAYAGAN
NG BIKOL

Taon XXIX Blg. 3
Oktubre-Disyembre 2005


Pagmiminang Lafayette sa Rapu-rapu, Salot sa Mamamayan!

Pansamantalang itinigil ang operasyon ng Rapu-rapu Polymetallic Project, isang kumpanya sa pagmimina sa Rapu-rapu, Albay na nasa ilalim ng multinasyunal na kumpanyang Lafayette Philippines Inc., dahil sa fishkill na naganap nitong Oktubre 11 at 31.

Ang fishkill o malalakang pagkamatay ng mga isda sa Albay Gulf hanggang sa kaharap na karagatan ng Sorsogon ay sanhi ng tahasang pagtapon ng latak ng mina sa karagatan na sadyang pinaagos sa sapa.

Ang mine tailings ay mga basurang kemikal at mineral mula sa pinruseso nang mga mineral.

Nagiging sanhi ito ng kontaminasyon at pagkalason ng kalikasan, kapag hindi maayos ang pinag-iimbakan nito. Sa kaso ng Rapu-rapu, cyanide ang nakalalasong kemikal mula sa mine tailings na lumason sa mga isda at iba pang nabubuhay sa dagat. Ang cyanide ay ginagamit upang ihiwalay ang ginto mula sa kinakapitan nitong ores o mga bato. Ginagamit naman ang mercury sa pagmimina ng iba pang mineral upang maihiwalay ang mga ito sa iba pang uri ng mina.



sundan sa pahina 2

Nilalaman

Oktubre-Disyembre 2005

Kumpanya sa Pagmimina sa Rapu-rapu, Nilalason ang Karagatan	1
Editorial: Panunupil sa Pulitika, Huling Hirit ng Gumuguhong Rehimen	3
Panunupil ng Estado: Lider ng Bayan Muna, Pinaslang	6
Mga Kaso ng Pamamaslang ng Berdugong 31st IB	6
ALECO: Mataas na Singil sa Kuryente, Dagdag na Pasanin ng mga Albayano	7
Taktikal na Opensiba: Reyd sa PNP Sub station, Matagumpay	10
Diwang Rebolusyonaryo: Anibersaryo	12
Batoy	14

Pagbati sa ika-37 Anibersaryo ng Partido Komunista ng Pilipinas!

Pagmimina ng Lafayette, Salot sa Mamamayan!

Ayon sa paliwanag ni Andrew McIlwain, ang dayuhang namamahala sa kumpanya ng mina, menor na insidente lamang daw ang pag-apaw ng mine tailings. Ang unang insidente umano ay naibuhos ang basurang kemikal sa maling lugar at ang pangalawa naman ay sanhi ng paglakas ng ulan kung kaya't umapaw ang mine tailings.

Subalit ayon sa pagsusuri ng grupong pangkalikasan na nagkaroon ng Fact Finding Mission sa lugar, sadyang pinakawalan ang mine tailings noong Oktubre 31. Dahil mapupuno na ang dam na pinag-iimbakan nito, sinadyang binuksan ang dam at ipinaagos tungo sa karagatan upang hindi masira ang nasabing dam. Animo'y bahang rumagasa ang mine tailings sa sapa hanggang makaabot sa karagatan.

Hindi lamang mga isda, kundi maging ang iba pang uring nabubuhay sa dagat ang pinatay ng mine tailings. Karamihan ng mga namatay na isda at yamang-dagat ay yaong nasa tabing-dagat ng Brgy Binosauan, ang pinakamalapit na barangay sa sayt ng mina. Hindi lamang limitado sa Rapu-rapu ang epekto ng pagkalason ng mga isda. Naapektuhan din ang maraming tabing-dagat na bayan sa kaharap na prubinsya ng Sorsogon.

Nalagay sa panganib ang buhay at kalusugan ng mga Bikolano sa pagkalason ng napakaraming isda at produktong dagat. Sa maagang pagkilos ng mga mangingisda at mga upisyales ng mga apektadong bayan ay naipaabot sa publiko ang mga nalasong isda at pagkaing dagat. Milyones ang nawala sa ekonomya ng mga bayan sa ikalawang distrito ng Sorsogon dahil sa pagkalason ng dagat. Pangunahing nakaasa sa pangangisda ang kabuhayan ng mga tao rito.

Boluntaryong itinigil ng kumpanya ang pag-oopereyt. Ngunit, ito ay dahil pa sa paghahanda ng pagpalit ng aktibidad nito mula sa pagtutok sa pagkuha ng ginto tungo sa paghukay ng *sulphide ores* na pinanggagalingan ng mga metal na *zinc* at tanso at iba pang mga mamahaling metal. Pabor ito sa kumpanya dahil sa kalagayang nasa pinakamataas ang halaga ngayon ng *zinc* at tanso sa pandaigdigang pamilihan.

Kamakailan lamang inimbitahan pa ni Gloria Macapagal-Arroyo si Andrew McIlwain upang makasalo sa isang hapunan sa Malakanyang. Mula sa umpisa ng proyektong pagmimina ng Lafayette sa Rapu-rapu, pinaburan na ito ni GMA at maraming insentibo ang ibinigay sa kumpanya upang makapag-opereyt.

Ang pamprobinsyang pamahalaan ng Albay at Sorsogon ay kumilos pabor sa interes ng Lafayette. Ang kanilang mga naging hakbang ay upang mapayapa lamang ang ng mamamayan at pinahihintay sa mapanlinlang na mga "independent na pagsisiyasat sa fish kills".

sundan sa pahina 3

Pagmimina ng Lafayette, Salot sa Mamamayan!

Tinangay na yaman

Ang Rapu-rapu Polymetallic Project ay isang open-pit na pagmimina na sumasaklaw sa mga barangay ng Malobago, Pagcolbon at Binosauan sa isla ng Rapu-rapu. Subsidyaryo lamang ito ng kumpanyang Lafayette na nakabase sa bansang Australia.

Dahil open-pit, ang operasyon nito ay nangangahulugan ng malakihang pag-uuka at pagpapatag ng itaas na bahagi ng bundok na hinuhukay. Saklaw nito ang 1,719 ektarya ng kalupaan. Nakaamba rin ang pagmimina ng isa pang dayuhang korporasyon na sasaklaw naman sa 2,767 ektarya. Aabot sa 4,486 ektarya ng Rapu-rapu ang miminahin ng dalawang kumpanya, o katumbas ng 80 porsyento ng buong lawak ng isla.

Luwal ang proyektong ito ng anti-mamamayan at maka-dayuhang Batas sa Pagmimina ng 1995 na muling pinagtibay ng Korte Suprema noong 2004. Kung kaya't todo-layaw ang kumpanya sa mga insentibong ibinigay ng reaksyunaryong gubyrno sa mga dayuhang kumpanya sa pagmimina. Idineklara pa ang Rapu-rapu bilang *special economic zone* upang lubusang maibigay sa Lafayette ang paglilibre sa pagbabayad ng buwis sa isang takdang panahon.

Nagsimula ang operasyon ng kumpanya noong Hulyo 2004. Ang halaga ng kapital nito ay 63 milyong dolyar. Malaking bahagi nito ay inutang sa isang bangko sa Australia at ginagarantiyahan ng reaksyunaryong gubyrno ng Pilipinas.

420 kilo na ng ginto at pilak ang dinala ng Lafayette sa Hongkong. Ngunit maging ang pamahalaan ng Albay ay nagrereklamo sa di pagbibigay ng Lafayette ng totoong deklarasyon kung gaano kalaki na ang namimina ng kumpanya. Tinatarget umano nitong

makapagluwal ng 2,500 toneladang tanso at 4,200 toneladang zinc sa susunod na taon. Kasabay pa rin sa produksyon ang mga mamahaling metal na ginto at pilak.

Ang Rapu-rapu Polymetallic Project ang pinaka-unang proyektong dayuhan sa pagmimina sa bansa sa mahigit 30 taon. Ipinamamandila ng maka-dayuhang presidente na si Gloria Macapagal-Arroyo na nagpapakita raw ito ng muling pagsigla ng industriya sa pagmimina sa bansa. Ngunit hindi ang komprehensibong pag-unlad ng lokal na industriya para suplayan ng iba-ibang metal na materyal ang dahilan ng ipinangangalandakang pagsigla ni Macapagal-Arroyo, kundi ang pagkaubos ng suplay ng ginto at iba pang metal bunga ng imperyalistang gera ng US sa Iraq.

Hungkag na hukay

Ang pagmimina sa isla ng Rapu-rapu ay nagsimula pa noong panahong sakupin ng imperyalistang Hapon ang Pilipinas. Magmula noon, papalit-palit nang kumpanya ang humawak ng mga proyekto rito. Matataas na grado ng mga mineral tulad ng karbon, tanso, *nickel*, *zinc*, ginto at pilak, ang nakukuha sa isla.

Subalit nananatiling isa sa pinakapobreng munisipyo ng Albay ang Rapu-rapu. Tanging mga dambuhalang hukay at mala-disyertong dating lupang agrikultural ang pangmatagalang pamana ng pagmimina sa lugar. Ganoon din ang pananatili ng karukhaan at kawalang kaunlaran sa Paracale, Camarines Norte at iba pang minahan sa bansa.

Hindi totoong kasama ang mamamayan sa pag-unlad sa kabila ng deka-dekadang taon ng pagmimina.

Laban para sa kalikasan at kabuhayan

Sa simula pa lamang binuo na ang organisasyong tumutuligsa sa muling pagbuhay ng mapaminsalang pagmimina sa Rapu-rapu.

sundan sa pahina 4



Panunupil sa Pulitika, Huling Hirit na ng Gumuguhong Rehimen ni Gloria

Tusong maniobra ng rehimeng US-Arroyo na balutan ng ligalidad ang mga hakbangin nito, na sa esensya ay sumusupil sa mga karapatang pampulitika ng taumbayang nagnanais na ibagsak ang pasista at kontra-mamamayang rehimen.

Calibrated Preemptive Response o CPR ang ipinambubusal ni Arroyo sa laksa-laksang nagpuprotesta laban sa kanya. Layon diumano ng patakarang CPR na pigilan ang anumang kaguluhan at destabilisasyon na maaaring idulot ng mga mobilisasyong kontra-GMA. Kung kaya't malimit na gamitan ng dahas ang mga nagrarali, sa pamamagitan ng pagharang sa kanilang hanay, pambabatuta ng mga pulis, pambobomba ng tubig, o di kaya'y pagdampot at pagkulong sa kanila.



Sinundan pa ang CPR ng Executive Order 464, na nagbabawal na dumalo ang sinumang bahagi ng ehekutibo ng reaksyunaryong gubyrno sa mga pagdinig ng Kongreso at Senado, na walang pahintulot ni GMA. Nais nitong pigilan ang pagkakabunyag ng mga ebidensyang nagpapatunay sa mga kasong korapsyon at pandaraya ni GMA sa eleksyon.

Dahil sa pangangayupapa sa patuloy na suporta ng amo nitong imperyalistang US, nais ding ipasa ni Arroyo ang Anti-terrorism Bill. Kunwa'y laban sa terorismo ang panukalang batas ngunit pinupuntirya nito sa katotohanan ang rebolusyonaryong kilusan at ang ligal na demokratikong mga organisasyon na nangunguna sa pagkontra sa kanya. Walang habas na sasagasaan ng Anti-terrorism Bill ang mga karapatang sibil at kalayaan ng mamamayan.

Garapalang isinusulong naman ng paksyon ni Arroyo ang charter change o chacha. Batay sa mga panukala ng mga alipures ni Arroyo sa pagbabago sa Konstitusyon ng 1987, gagawing parlamentaryo ang kasalukuyang sistema ng paggugubyrno, na kung saan ang pamumuno ay hahawakan ng isang presidente at isang punong ministro.

sundan sa pahina 5

Pagmimina ng Lafayette, Salot sa Mamamayan!

Kabilang rito ang mga apektadong taumbaryo, mga grupong kalikasan, mga mangingisda at mga taong simbahan.

Mas lumakas ang suporta sa mga pagkilos laban sa kumpanya nang mangyari ang pagkalason ng karagatan dahil sa mine tailings. Linahukan na ito ng ilang *local government units* mula sa iba't ibang bayan ng Sorsogon at Albay. Mariing inirerehistro ng mga pagkilos na itigil ang operasyon sa pagmimina.

Hindi lamang nakakulong sa isyu ng nangyari pa lamang na fishkill ang laban. Bitbit din ng nagpuprotestang mamamayan ang panawagang ipawalang bisa ang anti-mamamayan, anti-kalikasan at maka-dayuhang Batas sa Pagmimina. Kasabay nito ang demandang isabansa ang industriya sa pagmimina at pagtitiyak ng sustenableng pamamaraan para sa kalikasan at kabuhayan ng mamamayan.

S

Si GMA bilang presidente, ay mas hahaba pa ang panahon ng pag-upo sa pwesto, at mas lalawak pa ang saklaw ng kanyang kapangyarihan.

Kaugnay ng pagbabago ng konstitusyon ang pagpapasok ng mga batas na lubusang papawi sa mga restrikyon upang malayang makapandambong ang mga dayuhang monopolyo-kapitalista sa ekonomya ng bansa. Kasabay pa nito ang pagpapahintulot sa panunumbalik ng base militar at walang-sagkang pagpakat ng mga tropang Amerikano sa Pilipinas.

Binabraso rin ni GMA na hindi matuloy ang eleksyon sa taong 2007. Paraan niya ito upang hindi mapalitan ang mga kaalyado niyang nasa pwesto.

Lihim na lagim

Bagama't lantaran ang mga maniobra ni Arroyo upang makapangunyapit sa pwesto, mas nakahihindik ang kanyang mga tagong hakbangin upang patahimikin ang lumalaban sa kanyang rehimen.

Naninibasib ang mga death squad na direktang inaalagaan ng mga militar, at ginagamit laban sa mga myembro ng mga progresibong organisasyon na aktibong tumutuligsa sa rehimen ni Arroyo. Kabilang si Ding Uy ng Bayan Muna-Sorsogon sa mga pinakahuling biktima ng mga berdugo.

Desperado rin si GMA na bigwasan ang rebolusyonaryong kilusan na alam niyang may pinakamalawak na baseng masang lumalaban sa kanya. Ngunit, hindi nagtatagumpay ang kanyang bayarang sandatahang lakas na durugin ito, partikular ang Bagong Hukbong Bayan. Kung kaya't sinusubukan niyang pahinain ang suportang masa ng PKP-BHB-NDF sa pamamagitan ng pagterorisa, pagdukot at pagpaslang sa mga pinaghihinalaang taga-suporta ng rebolusyonaryong kilusan. Si Jesus Lombo ng Ragay, Camarines Sur ay pinagbabaril ng mga elemento ng 31st IB Philippine Army.

Lansakang paglabag naman sa Comprehensive Agreement on the Respect for Human Rights and International Humanitarian Law (CARHRIHL) ang idinudulot ng malawakang operasyong militar sa kanayunan. Nitong Hulyo lamang, pinatindi ang sakyada ng mga militar sa mga bayan ng Presentacion, Garchitorena, Caramoan at Tinambac, sa prubinsya ng Camarines Sur. Aabot sa 40 na pamilya sa Presentacion ang sapilitang pinalikas.

Malapad na kilusang masa upang patalsikin si Gloria

Maging ang mga paksyon ng naghaharing uri na kaagaw ni GMA sa kapangyarihan ay aktibong nananawagan sa kanyang pagreresayn o kaya ay sa pagpapatalsik sa kanya. Kabilang ang mga dating pangulo ng bansa sa nananawagan kay GMA na bumaba na sa pwesto. Ang mga sumusuporta sa namayapang si Fernando Poe Jr, na dinaya ni Gloria sa eleksyon, ay kumikilos din sa pagpapatalsik sa kanya.

Bagama't hawak pa ni Arroyo ang pamunuan ng AFP at ng PNP, may substansyal na bahagi nito ang kumukontra sa kanya. Signipikante ang bilang ng mga karaniwang sundalo na hindi na rin kayang sikmurain ang nabubunyag na mga katiwalian at pandaraya ng kanilang commander-in-chief na si GMA. Maliban pa rito, malawakan ang demoralisasyon sa hanay ng mga sundalo dahil sa mga internal na katiwalian, korapsyon at pagpapaksyon. Kung kaya't ang mga patriyotikong sundalo ay handang sumuporta at makipagtulungan sa malawak na kilusang masang anti-Arroyo.

Nasa unahan ang alyansa ng mga progresibong organisasyon na puspusang kumikilos upang mapatalsik si Gloria Macapagal-Arroyo. Ang mga organisasyong ito ang may malawak na kasapian sa hanay ng kalakhang masa laban kay GMA.

sundan sa pahina 6

Panunupil ng Estado:

Lider ng Bayan Muna, Pinaslang

Pinaslang ng berdugong death squad ng Philippine Army ang brodkaster ng istasyong DZRS at provincial chairman ng Bayan Muna (BM)-Sorsogon noong Nobyembre 18. Bandang alas-onse ng umaga nang pagbabarilin si Ricardo "Ding" Uy sa harap ng kanilang rice mill sa Brgy Basud, Sorsogon City.

Siya ang presidente ng Sorsogon Independent Media Reporters, Inc. na siyang nagtataguyod ng karapatan para sa malayang pamamahayag ng midya sa prubinsya.

Si Uy ay aktibong naglantad at tumuligsa sa mga kabulukan at karahasan ng estado laban sa mamamayan. Kasabay siya sa December 10 Committee na naghanda para sa kilos protesta sa Pandaigdigang Araw ng Karapatang Pantao. Isa siya sa matatapang na taga-midya na nananawagan para sa pagbaba ni Macapagal-Arroyo sa pwesto.


Sa kanyang burol at libing, mariing pinanawagan ng kanyang mga kapamilya, kaibigan at mga kasamahan sa midya at sa BM ang katarungan para sa lahat ng biktima ng mga paglabag sa karapatang pantao.

Sinalubong ng isang indignation rally ang pakitang-taong pagbisita sa kanyang burol ni Gen Arturo Lumibao ng PNP.

Hinatid si Uy ng mahigit 2,500 katao sa isang militanteng martsa libing na mariing nagpahayag ng pagkundena sa pamamaslang ng estado sa mga aktibista at lider ng mga progresibong grupo.

Siya ang ika-67 myembro ng BM na pinaslang sa ilalim ng panunungkulan ng pasistang rehimeng Macapagal- Arroyo. Ito ay sistematiko at planadong kampanya ng panunupil ng estado upang patahimikin ang mga grupong nagsusulong ng kanilang mga demokratikong karapatan. Ito ay desperadong hakbang para supilin ang kilusang pagpapataksik laban sa rehimen.

M g a Kaso ng Pamamaslang Ng Berdugong 31st IB



Sa Camarines Sur, pinaslang ng mga pasistang elemento ng 31st IB ang isang 52-taong gulang na myembro ng Bicol Coconut Planters Association, Inc., at ng Anakpawis. Pinagbabaril ang magniniyog na si Jesus Lombo Jr sa harap ng kanilang bahay sa Brgy Baya sa Ragay noong Oktubre 26. Sugatan din ang anak nitong si Exequiel na myembro rin ng Anakpawis.


sundan sa pahina 7

Panunupil sa Pulitika

At, ito rin ang totoong nagsusulong ng mga adyendang sumasalamin sa interes ng mamamayan para sa batayang pagbabago sa ekonomya at pulitika. Ang sama-samang pagdaluyong ng malapad na mamamayan sa ilalim ng alyansang ito ang nagiging bangungot ni GMA sa kanyang pananatili sa Malakanyang.

Bira ng BHB laban kay GMA

Susi ang sustenido at malawakang pagputok ng mga taktikal na opensiba ng BHB upang mas lalong yanigin ang trono ni Gloria Macapagal- Arroyo. Sinusuportahan ng mga ito ang mga pagkilos ng masa upang patalsikin si Arroyo. Habang kaliwa't kanan na nabibigwasan ang bayarang sandatahang lakas ni GMA, hindi nito kayang pokusan ang pagsupil sa mga kilos-protesta ng mamamayan. Lalong nalalantad ang marupok na pundasyon ng rehimen ni GMA na malapit nang ibagsak ng sama-samang pagkilos ng taumbayan.



S

ALECO:

Mataas na Singil sa Kuryente, Dagdag na Pasanin ng mga Albayano

Nabubulok na pasilidad, pagkabangkarote, at lumulobong utang. Ito ang kinakaharap na problema ngayon ng Albay Electric Cooperative (ALECO). Ito ang kooperatiba ng kuryente na nagseserbisyo sa prubinsya ng Albay.

Sa buong bansa, ang ALECO ang ikalawang kooperatiba ng kuryente na may pinakamaraming bilang ng konsumedores. Mula 2001, ang 680 ng kabuuang 720 baranggay sa prubinsya ay may linya na ng kuryente. Naitala ang Albay bilang pangalawang may pinakamalaking konsumo ng kuryente sa rehiyong Bikol.

Mataas na Singil, Epekto ng EPIRA

Nakahanay ang ALECO sa mga kooperatiba ng kuryente na mataas ang singil. Walang humpay ang pagtaas nito ng singil sa kuryente. Ibinunga ito ng pagsasabatas ng Electric Power Industry Reform Act (EPIRA) noong taong 2001.

Ang EPIRA ay may layunin diumanong iangat ang kalidad ng serbisyo ng kuryente sa bansa. Ibinukas din nito sa pamumuhunan ng mga dayuhang kapitalista ang National Power Corporation (NAPOCOR), National Transmission Corporation (TransCo), at mga kooperatiba ng kuryente. Tahasang ibinukas sa pribatisasyon ang buong industriya ng kuryente.

Kabilang sa probisyon ng EPIRA ang pag-abswelto diumano sa utang ng mga kooperatiba ng kuryente. Mapanlinlang ang prubisyong ito. Sa kaso ng ALECO, ang inabsweltong P300 milyong utang ay nangangahulugan ng 11 sentimos na diskwento sa kada isang kilowatt-hour (kwh) na singil sa kuryente. Inilalagay ito sa resibo ng konsumedores sa ngalan ng *loan condonation*. Pero sa katunayan, sinisingil ulit ang nasabing halaga sa idinagdag naman na *universal charge*.

Bahagi din ng EPIRA ang iskemang *unbundling of rates*, na lalo pang nakadagdag sa singil sa kuryente. Pinadedetalye ng Energy Regulatory Commission ang resibo ng mga kooperatiba ng kuryente para malaman daw ng mamamayan kung ano ang kanilang binabayaran. Pero naging paraan lamang ito upang idagdag ang kung anu-anong mga bayarin. Tumaas ng 54 porsyento ang singil ng ALECO.

Nadagdagan pa ng sampung porsyento ang singil ng ALECO mula nang ipatupad ang Expanded Value Added Tax (EVAT) nitong Nobyembre 1. Aabot na ngayon ang singil sa halos walong piso ang kada kilowatt-hour. Sa Enero 2006, madadagdagan pa ito sa pagtaas ng ipinapataw na EVAT sa 12 porsyento.

sundan sa pahina 8

Mga Kaso ng 31st IB

Ang pamilya Lombo ay dati nang pinagbantaan ng mga elemento ng 31st IB. Inakusahan sila ng mga militar na taga-suporta diumano ng NPA.

Sa Camarines Norte, pinaslang din ng mga elemento ng 31st IB si Brgy Capt Andres Baldesoto sa Brgy Cabanbanan, San Vicente nitong Nobyembre 16. Si Baldesoto ay dating kasapi ng NPA na inakusahan ng mga militar na patuloy pa rin daw sa pagsuporta sa kilusan. Noong Abril pa siya pinagbantaan ng mga militar. Humingi siya noon ng tulon sa Sangguniang Panlalawigan upang bigyang proteksyon ang kanyang buhay.

S



Hinuwhutan ng mga Burukrata Kapitalista

Mula noong 1996, isinailalim ng National Electrification Administration (NEA) sa direktang kontrol nito ang ALECO. Pinawalangbisa ng NEA ang otoridad ng pamunuan ng kooperatiba na ihinalal ng mga konsumedores ng ALECO sa isang pangkalahatang asembliya. Sa halip, itinalaga ng NEA ang mga tauhan nito bilang administrador ng ALECO.

Kasabay ng pagpasok ng mga administrador mula sa NEA, lalong tumindi ang maanomalyang pangangasiwa sa ALECO. Maraming nawalang kita at nawaldas na pondo. Mula Hulyo 1999 hanggang Setyembre 2001, tumaas ang pagkalugi nito sa pitong milyong piso kada buwan. Umabot ang pagkalugi sa P426 milyon noong 2003.

Lalo pang nabaon sa utang ang ALECO. Umabot sa P645 milyon ang utang ng ALECO sa NAPOCOR, TransCo at NEA noong Disyembre 2004.

Aabot lamang sa P375 milyon ang halaga ng mga ari-arian ng ALECO. Kaya kahit ibenta ng ALECO ang lahat nang ito, kulang pa rin itong pambayad sa utang. Sa kabila ng pagkalugi, ang mga administrador na itinalaga ng NEA ay tumatanggap ng alawans na P57,000 kada buwan.

Noong 2000, kinurakot ng mga administrador ng ALECO ang siyam na milyong pisong pondo ng kooperatiba sa pamamagitan ng isang *ghost purchase*. Iniulat nila ang pagbili ng isang substation para sa bayan ng Polangui, pero sa katonayan, walang nabili at naitayong substation.

Malaki ang pananagutan ng mga burukrata ng NEA sa pagbulusok ng kalagayan ng



serbisyo ng ALECO. Mula sa pagiging "class D" noong dekada 1980, bumagsak ito sa kategoryang "class E" na kooperatiba ng kuryente sa kasalukuyan. Kaya itinutalak ng NEA ang pagsasapribado nito para diumano maiangat ang kalidad ng serbisyo.

Pribatisasyon ng ALECO

Itinutalak ng rehimeng Macapagal-Arroyo sa sulsol ng IMF-World Bank ang pribatisasyon ng serbisyo sa kuryente.

Noong 2004, itinulak ng NEA at Department of Energy (DoE) ang pagpasok ng mga pribadong korporasyon sa pangangasiwa sa mga kooperatiba ng kuryente. Ayon sa DoE, ito ang paraan upang magkaroon ng higit na papel ang pribadong sektor sa industriya ng kuryente. Sa madaling sabi, pribatisasyon ang tinutalak ng DoE.

Isa ang ALECO sa limang kooperatibang nakasalang na isubasta sa mga dayuhang kumpanya. Nagmaniobra ang NEA at mga lokal na burukrata sa prubinsya upang magkaroon ng kasunduan ang ALECO at ang Salcon, isang dayuhang kapitalistang korporasyon mula sa Singapore. Pinakialaman ng NEA ang mga pang-organisasyong proseso ng kooperatiba.

sundan sa pahina 9

Pagtaas ng Singil

Mula Nobyembre 1, 2005 (pagpasok ng EVAT): P7.9165 kada kwh.

Hunyo 2005: P7.1968 kada kwh

Disyembre 2004 (pagkatapos ng *unbundling*): P6.4698 kada kwh

Setyembre 2003: P4.1991 kada kwh

Kung ang isang pamilya ay kumukunsumo ng 100 kwh kada buwan, ang sisingilin sa kanila ng ALECO ay P791.65 o halos walong daan piso.

ALECO: Mataas na Singil sa Kuryente

Nagpatawag ang mga kakutsaba nitong administrador ng ALECO ng isang espesyal na pangkalahatang asembliya upang aprubahan ang kontrata sa pangangasiwa ng Salcon sa ALECO noong Pebrero 2001.

Kontrata sa Dayuhang Salcon

Naglalaway na magkamal ng limpak-limpak na pondo mula sa ALECO ang Salcon at kasapakat nitong mga burukrata. Imbes na idaan sa pagsubasta, tahasang inalok ng NEA ang pangangasiwa ng ALECO sa korporasyong Salcon.

Binalangkas ng korporasyong Salcon ang kontrata sa pangangasiwa sa ALECO noong 2002. Ito na ang mamamahala sa administrasyon, operasyon, at maging sa pinansya ng ALECO.

Pangangasiwaan ng Salcon ang ALECO sa loob ng 20 taon. Tatanggap ito ng P4 milyon taun-taon para sa pangangasiwa, at dagdag na P2.8 milyon ayon sa nakasaad sa kontrata.

Ibinabandera ng mga kasapakat ng korporasyong Salcon sa lokal na burukrasya na mapapahusay ng kumpanya ang serbisyo ng ALECO. Pero sa katunayan walang malinaw na nakalahad sa kontrata na gagastusan ng Salcon ang pagpapaunlad ng mga pasilidad ng ALECO. Lahat pa rin ng gastusin ng ALECO ay kukunin sa kikitain ng kooperatiba.

Ang ipinagmamalaki ng mga burukrata na P500 milyong kapital na ipapasok ng korporasyong Salcon sa ALECO ay hindi naman nakasulat sa kontrata. Kung pagbabatayan ang kontrata, ang tanging

pera na ilalabas ng korporasyon ay ang *rehabilitation fund*. At, walang nakasaad kung magkano ito. Tahasan ding ipinagbabawal ng kontrata na malaman ng publiko ang mga probisyon nito.

Wala ring ilinahad na mababawasan ang mga *brownout* sa Albay.

Malawakang tanggalan naman ng mga manggagawa sa ALECO ang idudulot ng reorganisasyon na nakasaad sa kontrata. Sa kung anu-anong dahilan, tatanggalin sa trabaho ang kayraming mga empleyado upang ipasok naman ang mga personel at konsultant ng Salcon.

Imbes na buhusan ng suporta ng NEA, sinasadya nitong gipitin ang ALECO upang panatilihin ang nabubulok na pasilidad upang bigyang matwid ang pribatisasyon nito. Dagdag pang panggigipit sa ALECO ang banta ng NAPOCOR na puputulan ng linya ng kuryente dahil sa hindi nababayarang utang ng kooperatiba.

Pagtutol ng mga Konsumedores

Sa pananaw ng mga makabayang inhinyero at konsumedores, ang mga teknikal na solusyon para sa rehabilitasyon ng ALECO ay kayang gawin kahit hindi pumasok ang korporasyong Salcon sa pangangasiwa ng kooperatiba.

Mariing ipinapahayag ng mamamayang Albayano ang kanilang pagtutol sa pribatisasyon ng ALECO. Ibinasura nila ang plano sa pribatisasyon at ang kontrata ng korporasyong Salcon sa isang espesyal na pangkalahatang asembliya ng mga konsumedores ng kooperatiba noong 2003.



sundan sa pahina 10



Taktikal na Opensiba


Reyd sa PNP Substation, Matagumpay

Camarines Sur —Matagumpay na nireyd ng mga pulang mandirigma ang Police Substation sa Brgy Masoli, Bato noong Disyembre 5.

Alas dose kwarenta y singko ng madaling araw nang ireyd ito ng mga pulang mandirigma nakasakay sa trak at dalawang van.

Halos magkasabay ang hudyat na putok mula sa asolt tim na bumaba mula sa trak at ang putok mula sa pormasyong hinarang ng pulis sa tsekpoynt na nakapwesto ilang metro mula sa PNP substation.

sundan sa pahina 11



ALECO: Mataas na Singil sa Kuryente

Binatikos din nila ang panghihimasok ng NEA sa ALECO. Idineklarang bakante ang pamunuan ng ALECO at nanawagan para sa paghahalal ng bagong administrasyon. Naghapag din sila ng alternatibong solusyon sa mga problema ng ALECO sa pakikipagtulungan sa mga makabayang syentista at inhinyero.

Hanggat hindi naitatayo ang isang tunay na kooperatiba ng mamamayan, magpapatuloy ang komersyalisadong oryentasyon ng mga serbisyo nito.

Hangga't hindi naisasabansa ang industriya ng kuryente at hindi nagkakaroon ng pambansang industriyalisasyon, magpapatuloy sa pagdausdos ang kalagayan ng serbisyonang maibibigay ng ALECO.

S

Reyd sa PNP Substation, Matagumpay

Matapos ang limang minutong bugso ng putok mula sa umaabanteng dose kataong tim sa asolt, mabilis na nakontrol ang target. Sa unang dalawang minuto lamang nagkaroon ng mangilan-ngilang ganting putok mula sa kaaway. Epektibong nagamit ang granada para magapi ang target. Matapos nito, tuluyan nang nagsitakas ang takot na takot na mga pulis.

Mahusay ang naging koordinasyon ng tim sa asolt. Putok-maniobra ang kanilang ginawa upang makadikit sa target na may 10 metros na distansya mula sa kalsada. Halos pader na lamang ang naging pagitan ng mga pulang mandirigma at ng kaaway.

Walong minuto lamang ang itinagal ng buong operasyon, kasabay na ang pagklining ng mga armas. Mabilis at ligtas ang naging pag-atras mula sa labanan.

Nakasamsam ng limang M16 armalayt, isang M14, dalawang kalibre 38, isang 9mm at mga bala. Namatay sa labanan ang timlider sa Substation na si SPO3 Elmer Cangayo at sugatan ang tatlo pang elemento ng PNP. Walang anumang pinsala sa hanay ng BHB.

Ayon sa CO ng operasyon, mabilisang nakasakay na reyd ang naging disenyo dahil sa kalagayang nasa gilid lamang ng haywey ang lokasyon ng target. Ito ay napapaligiran rin ng mga detatsment at istasyon ng kaaway na mabilis na makakapag-reimpors, kung sakali.

Aniya, nakahanda ang mga kasama sakaling magreimpors ang malalapit na pwersa ng kaaway. Tiniyak sa plano ang pagpusisyon ng mga *blocking force* para sa kaligtasan ng main body na nag-asolt, kahit pa nga salat sa kober at medyo alanganin ang pwestong

pinusisyunan. Kalakhan ng pwersa sa operasyon ay itinalaga bilang *blocking force*.

Ngunit hindi man lang nagtangkang sumaklolo sa napalabang mga elemento ng PNP ang napakalalapit na pwersa mula sa hedkwarter ng 42nd IB Philippine Army sa Brgy Nierva sa Nabua; 247 PNP Mobile Group; mga Police stations sa Nabua at Matacon sa Polangui, Albay; at maging ang detatsment ng Philippine Army sa Brgy Antipolo, Iriga. Tanghali na kinaumagahan nang dumating para mag-reimpors ang dalawang trak ng Philippine Army.

Susi sa naging tagumpay ang mahusay na gawaing paniktik at ang malalim na suportang masa. Makailang ulit na nasarbey ang target at ruta ng byahe. Naghanda rin ng iba't ibang ruta para sa ligtas na pag-atras ng tropa. Sa paggamit ng relief map sa dry run, masusing kinabisa ng mga pulang

mandirigma ang aktwal na labanan.

Kwento pa ng kasamang nasa tim ng asolt, di naging mahirap ang pagkontrol sa target. Pagkat kabisado ang target at determinado ang mga kasama sa pagpakat at pag-abante. Mabilis ang naging maniobra sa labanan.

Bilang pangangalaga sa kaligtasan ng mga sibilyan, isinagawa ang nabanggit na operasyon sa oras na hindi matao

sa lugar at nagtalaga rin ng tim para harangin ang mga sasakyan na pwedeng dumaan sa haywey habang nagaganap ang labanan.

sundan sa pahina 12



Anibersaryo

Petsa bente sais.

Maagang maaga pa pero abala na ang lahat para sa paghahanda sa okasyon. Nakasalang na ang dalawang kalderong puno ng suman na pinagpuyatan kagabi ng mga kababaihang nagtutulong-tulong sa pagbabalot nito sa dahon ng saging. May isang umpok din ng mga kasamang nagkukwentuhan habang gumagawa ng siopao para sa meryenda. Kagabi pa pinakuluan ang karneng baboy na ulam para sa tanghalian.

Masigla at abala ang lahat, kahit ang ulan ay di pa rin tumitila mula pa kagabi. Maputik at madulas na sa bakuran at maging sa inookupang kusina, labas pasok naman ang mga kasamang may kani-kanyang pinagkakaabalahan. May nagpapatuyo ng iniimprentang t-shirt na isusuot mamaya. May mga nakikipila sa paliguan at may ilan pang kasamang nagpapagupit ng buhok.



Sa koprasan, di mabakante ang espasyong gagawing tanghalian mamaya. Laging may grupong nagpapraktis. Nakakabit na ang myural na siyang backdrop sa stage. Dumating na rin ang dagdag na gitarang gagamitin.


Marami na ang mga taong nagsisidatingan mula sa mga karatig baryo. Ang iba ay may mga bitbit pang kakanin at saging na panghimagas. Ang mga kabataan at estudyante ay kagabi pa rumegroup, kasabay ng ilang alyado mula sa sentro.

sundan sa pahina 13

Reyd sa PNP Substation, Matagumpay

Ipinagbunyi ng mamamayan sa Bato at mga karatig bayan ang matagumpay na reyd na ito laban sa matagal na nilang inirereklamong ilang abusadong elemento nito na nangingikil sa mga byahero at maging sa maliliit na magtitinda ng uling, gulay at iba pang produktong dumadaan sa tsekpoyt. Aktibo rin ang mga nireyd na

pulis sa pag-operasyon laban sa rebolusyonaryong kilusan.

Sinalubong ang magigiting na pulang mandirigma ng mga pagbati at nakahandang pagkain mula sa mamamayang labis na sumusuporta sa mga ilinulunsad na mga taktikal na opensiba ng BHB. 

Paunawa

Humihingi ng paumanhin ang Eduardo Olbara Command ng NPA-Camarines Sur sa nasugatang sibilyan na tumakbo sa harap ng PNP Substation habang nangyayari ang labanan. Sa abot ng makakaya ng rebolusyonaryong kilusan, nakahanda ang mga kasamang tumulong.

Diwang Rebolusyonaryo

Halos lahat ng bahay malapit sa pagdarausan ng aktibidad ay siksikan ang mga tulugan. Pero kung tutuusin, di naging prayoridad ang pagtulog. Di matapus-tapos ang kwento ng mga karanasan nitong nakaraang taon. Kagabi pa abala ang karamihan sa pagpapraktis ng kanilang mga itatanghal para sa programa.

Maging ang grupo ng mga bata ay naghanda rin ng ipapalabas. Nagpapraktis naman sa pagtula ang dalawang anak ng kasama. Araw din ng pagdalaw ng mga kapamilya ng kasama. Nagkasama-sama ang mga pamilyang rebolusyonaryo para ipagdiwang ang araw na ito.

Nagsasalimbayan ang kwentuhan at tugtog ng mga rebolusyonaryong awitin mula sa sound system na inaayos sa may koprasyon. Nagdagdag ng tolda para may masilungan ang mga tao.

Matao pero maayos ang sistema ng mga nagtataguyod ng gawain sa kusina. Naka-s4 na ang kanin at ulam, may nakatoka sa paghuhugas ng mga plato at maging sa pag-iigib ng tubig.

Muling bumuhos ang malakas na ulan habang pinagsasaluhan ang tanghalian. Halos kalahating oras ang hinintay bago humupa ang ulan. Umaambon pa nang lumipat ang mga tao sa koprasyon na nasa kabila pa ng sapa, kung saan gaganapin ang programa.

Matikas na nagpormasyon, nagmartsa at nag-drill ang platoon habang nagwawagayway ang bandila ng Partido Komunista ng Pilipinas. Sinimulan ang programa sa pag-awit ng Internasyunale.

Isang madamdaming dula-awit ang naging pambukas, bilang pagpupugay sa magiging na martir ng rebolusyon.

Di naging hadlang ang putikang mga paa at damit para magpakita ng husay at kakayahan sa pagtanghal ng dula, tula at kanta. Sa awit-galaw na Tambang, ipinamalas ng isang iskwad ng mga pulang mandirigma ang pagtudla, paggapang, pagtiger jump at pagtambling sa gitna ng maputik na damuhan.

Makabuluhang mga mensahe ang ipinaabot ng mga nagsalita mula sa iba't ibang sektor at baryo. Napaiyak pa ang isang nanay, pagkat nagagalak siyang ipinagpapatuloy ng kanyang mga anak ang pakikibaka. Aniya, nang mapanood ko ang pagtatanghal ng mga kasama sa hukbo, nasariwa sa aking diwa ang panahon noong ako'y pultaym pa. Ayon pa sa kanya, lalo akong nainspira sa paggampan ng mga gawain salokal, kahit nagkakaedad na.

Bumubuhos man ang malamig na ulan, nanatiling mainit at marubdob ang mensaheng hatid ng mga kasamang nagsalita. Binaybay ang kasaysayan ng Partido at ang maningning na mga tagumpay na nakamit sa nakaraang taon. Nang mabanggit ang kalagayan ngayon ng bansa sa pulitika at ekonomya, puno ng ahitasyong isinigaw ang: GLORIA! IBAGSAK!

Tila nais ng lahat na pahabain pa ang oras ng pagtitipon, kaya muling naghandog ng mga awiting nakapagpapataas ng diwang mapanlaban at nagpupugay sa dakilang pamumuno ng Partido sa pagrerebolusyon.

Habang pinagsasaluhan ang nakahandang meryenda, pinanood sa VCD ang mga bidyu dokumentaryo at ang brodkas ng Dagundong ng Bikol.

Nagpatuloy pa ang masiglang talakayan at kantahan.

Isang maghapon ng pagdiriwang, pagpapanibagong sumpa sa adhikain, at pagdakila sa mga nag-alay ng buhay ...



BATOY

'Lam n'yo ba kung sa'n
ang
punta ko ngayon?



Dadalo sa anibersaryo
ng ating Partido!
Tiyak maraming
pangkulturang
pagtatanghal dun!



Kahit nga ako,
may pinraktis din!
Aba!
Dapat lahat
may ambag.



Higit na matatag
ang Partido ngayon...

